



## EGEMEN QAZAQSTAN

Мемлекетшілдік мінбері

29 ЖЕЛТОҚСАН 2023 ЖЫЛ, ЖҰМА №250 (30729)

www.egemen.kz

E-mail: info@egemen.kz

FACEBOOK.COM/EGEMENKZ

TWITTER.COM/EGEMENKZ

### САРАПТАМА

## Экономикадағы қандай өзгеріс есте қалды?

Сонымен ресми жыл да аяқталды. Төккен тер, жеткен жетістік, кездескен қиындық, секем көңіл – бәрі бар. Дағдарыс салқыны әлі тарқамағанына қарамастан биыл отандық экономиканың өсімі 4 пайыздан асты. Ішкі жалпы өнім көлемі 4,9 пайыз болды. Жан басына шаққандағы ішкі жалпы өнім көлемі 11,5 мың доллардан 13,3 мың долларға дейін өсті. Инфляцияның баяулағаны да айта жүретін жетістік. Сондай-ақ осы жылы ел экономикасына шетелдік инвестиция тарту ісі де қарқынды жүрді.

### Абай АЙМАҒАМБЕТ, «Egemen Qazaqstan»

#### Экономика өсім көрсетті

Экономикалық даму аясында 967,7 млрд теңгеге 210 инвестиция басталды. Бұл өз кезегінде 20 мыңға жуық жұмыс орын құрды. Ал машина жасау саласындағы өндіріс деңгейі 26,8 пайызға дейін артқан. Бұл рекордтық деңгей болып есептеледі. Тауарлар экспортының құны 65 млрд долларға жеткен, оның 21 млрд доллары өңделген тауарларға тиесілі екенін айта кетейік. Кәсіпкерлік субъектілеріне 2,3 трлн теңге көлемінде мемлекеттік қолдау көрсетілді. Соның ішінде шағын және орта бизнесті қолдау көрсеткіші 209



млрд-тан 288 млрд долларға дейін өсті. «Жыл қорытындысы бойынша өңдеуші өнеркәсіп үлесі 13,4 пайызды немесе 30,2 млрд долларды құрады. Ауыр тиген 2022 жыл (+3,2 экономикалық өсім) сәтті

2023 жылға ауысты. Биыл біз жағдайға біршама икемделдік және 5 пайызға дейін өсеміз деп ойлаймын. Біз үшін 5 пайыз деңгейіндегі экономикалық өсім – қосымша 40 млрд доллар деген сөз. Негізгі

капиталға салынған инвестиция 2022-2023 жылдары 60 млрд долларға жуықтады», дейді қаржыгер Расул Рысмамбетов. Үкімет есебінде жыл соңына дейін шикізаттық емес секторда жалпы құны

1,6 трлн теңге болатын 291 жобаның пайдалануға берілетіні айтылған. Келер жылы 4,6 трлн теңгеге 400 жобаны іске қосу жоспарланып отыр.

Экономист Қайырбек Арыстанбековтің айтуынша, биыл қол жеткізілген ДЖӨ деңгейі 70 пайыз қазақстандықтың қажеттілігін жабады.

«Бүкіл халықтың қажеттілігін қамтамасыз ету үшін біз ДЖӨ қарқынын 7,1 пайыздан кем ұстамауымыз керек. Өйткені экономикамыз 5 құрылымдаушы секторға бөлінген, жалпы қосылған құн ағыны кезінде олардың арасында құрылымдық теңсіздік пен диспропорция пайда болады. Жиынтығында олар экономика үшін құрылымдық дағдарыс үшін негіз қалыптастырады. Биыл ел экономикасы бірқатар қиындықпен ұшырасты және оларды сыртқы, ішкі деп бөлуге болады. Ішкі қиындықтар – Үкіметтің экономикалық саясаты сапасының жеткіліксіз деңгейі, макроэкономикалық саясат бойынша мемлекеттік органдар арасындағы келісімнің болмауы, экономиканың біраз саласында монополия компоненттерінің сақталып отырғаны. Мысалы, банктердің ұлттық экономикаға берген несесі ДЖӨ-нің 9 пайызына дейін құлдырады. Бұл Үкімет пен Ұлттық банк арасындағы макроэкономикалық саясаттың дәйектілігін білдіреді», дейді сарапшы.

(Соңы 7-бетте)

### РЕСМИ

#### ҚАЗАҚСТАН РЕСПУБЛИКАСЫНЫҢ ЗАҢЫ

#### Қазақстан Республикасының кейбір заңнамалық актілеріне жер қойнауын пайдалану және экология мәселелері бойынша өзгерістер мен толықтырулар енгізу туралы

1-бап. Қазақстан Республикасының мына заңнамалық актілеріне өзгерістер мен толықтырулар енгізілсін:

1. 2017 жылғы 27 желтоқсандағы «Жер қойнауы және жер қойнауын пайдалану туралы» Қазақстан Республикасының Кодексіне:

1) 1-бап мынадай мазмұндағы 1-1-тармақпен толықтырылсын:

(Жалғасы 12-бетте)

#### ҚАЗАҚСТАН РЕСПУБЛИКАСЫ ПРЕЗИДЕНТІНІҢ ЖАРЛЫҒЫ

#### Қазақстан Республикасының әкімшілік-аумақтық құрылысының кейбір мәселелері туралы

«Қазақстан Республикасының әкімшілік-аумақтық құрылысы туралы» Қазақстан Республикасы Заңының 9-бабына сәйкес ҚАЗҰЛЫ ЕТЕМІН:

1. Шығыс Қазақстан облысы Қатонқарағай ауданының әкімшілік орталығы Шығыс Қазақстан облысы Қатонқарағай ауданының Үлкен Нарын ауылынан Қатонқарағай ауылына көшірілсін.

2. Шығыс Қазақстан облысының құрамында:

1) Қатонқарағай ауданының құрамынан бөлу жолымен әкімшілік орталығы Үлкен Нарын ауылында орналасатын Үлкен Нарын ауданы;

2) Күршім ауданының құрамынан бөлу жолымен әкімшілік орталығы Марқакөл ауылында орналасатын Марқакөл ауданы құрылсын.

3. Абай облысының құрамында:

1) Үржар ауданының құрамынан бөлу жолымен әкімшілік орталығы Мақаншы ауылында орналасатын Мақаншы ауданы;

2) Семей қаласының құрамынан Абыралы, Айнабулақ, Ақбулақ, Алғабас, Ертіс, Новобаженово, Озерка, Приречный, Жиенәлі, Достық, Қараөлең, Көкентау ауылдық округтері мен Шұлбі, Шаған кенттерін бөлу жолымен әкімшілік орталығы Семей қаласының аумағында орналасатын Жаңасемей ауданы құрылсын.

4. Орталық мемлекеттік органдар, Шығыс Қазақстан және Абай облыстарының жергілікті өкілді және атқарушы органдары орталық мемлекеттік органдардың тиісті аумақтық бөлімшелерінің, жергілікті өкілді және атқарушы органдар мен ұйымдардың іркіліссіз және тиімді жұмыс істеуін қамтамасыз ету жөнінде шаралар қабылдасын.

5. Осы Жарлықтың орындалуын бақылау Қазақстан Республикасы Президентінің Әкімшілігіне жүктелсін.

6. Осы Жарлық 2024 жылғы 1 қаңтардан бастап қолданысқа енгізіледі және ресми жариялануға тиіс.

Қазақстан Республикасының Президенті  
Қ.ТОҚАЕВ

Астана, Ақорда, 2023 жылғы 28 желтоқсан  
№ 424

### ХРОНИКА

Мемлекет басшысының өкімімен Ерлан Сапарұлы Оразбай Қазақстан Республикасы Президенті Іс басқарушысының орынбасары лауазымынан босатылды.

\*\*\*

Мемлекет басшысының өкімімен Қайрат Иманұлы Сунгаев Қазақстан Республикасы Ішкі

істер министрінің орынбасары лауазымынан босатылды.

\*\*\*

Мемлекет басшысының өкімімен Мұхамеджан Қадіржанұлы Таласов Қазақстан Республикасы Қорғаныс министрінің орынбасары лауазымынан босатылды.

### ӨЗЕКТІ

## Тұрғын үй – игілік факторы

Әлеуметтік орнықтылық, сапалы тұрмыс баспанамен байланыстырылатын басты қағидалар екені әркімге аян. Яғни елдегі тұрғын үймен қамту деңгейі халықтың әл-ауқатына тікелей әсер етеді. Бұл тұста кез келген мемлекет өз азаматтарының игілігін қамтамасыз ететін тиімді тетіктерді іске қосады. Бүгінгі таңда елімізде тұрғын үйдің қолжетімділігін арттыру үшін кешенді іс-шаралар қолға алынған.

### Ботағоз ӘБДІРЕЙҚЫЗЫ, «Egemen Qazaqstan»

Тұрғын үй – адам қажеттілігінің маңызды шарты болуымен қатар, халықтың басым көпшілігінің ұстап қалар арманы. Қазіргі таңдаулар бойынша бізде баспанамен қамтамасыз ету әлі де жеткіліксіз деңгейде. Мәселен, БҰҰ-ның әлеуметтік стандарты бір адамға 30 шаршы метрге жетсе, 2022 жылы бұл көрсеткіш бізде 23,6 шаршы

метрден келді. АҚШ пен Германия сияқты дамыған елдерде тұрғын үймен қамтамасыз ету деңгейі сәйкесінше бір адамға 70 және 50 шаршы метрді құрайды. Ал бізде бір адамның 30 шаршы метр тұрғын үймен қамтамасыз етілуіне қол жеткізу үшін тұрғын үй қорын 110 млн шаршы метрге 405-тен 515 млн шаршы метрге дейін ұлғайту қажет. Мемлекет басшысы халықтың басым көпшілігі үшін тұрғын үй ең өзекті мәселе болып отырғанына

назар аударып, тұрғын үй саясатын қайта қарауды, оның мейлінше әділ әрі икемді болуын қамтамасыз етуді тапсырған болатын. Қазіргі уақытта Үкімет азаматтарымызды тиісті тұрғын үймен қамтамасыз ету жөнінде жан-жақты шаралар қабылдап жатыр.

Биылғы 10 айда республика бойынша барлық қаржыландыру көзі есебінен 13,3 млн шаршы метр тұрғын үй пайдалануға берілді, 117, 3 мың отбасы өздерінің тұрғын үй жағдайларын жақсартты. Жалпы, осы жылы барлық көзді қаржыландыру есебінен 15,3 млн шаршы метр тұрғын үй салу жоспарланған. Жыл сайын жоспар 200 шаршы метрге ұлғайып отырады.

(Соңы 10-бетте)





